


S' Junteross 70




NUMMERE 10

DEZ. 89 / JAN. 90

*s'Junterross*

ISCH S HUUSBLETTLI VO DE JUNTERESSLI



**Baumann +  
Schaufelberger AG**

Elektrotechnische Unternehmungen  
Thiersteinallee 25

4053 Basel Telefon 331 77 00

Ihr Elektriker für alle Fälle

● **24h Pikettdienst** ●

Telefon- und Alarmanlagen

# 20 JOHR JUNTERESSLI


Mit däm glungene Helge under em Arm sin am friehe Morge vom 26. Novämber d Junteressli haimzue zottlet und hänn sich gfrait, will sy e saufeyne und gmietligen Obe erläbt ghaa hänn. Dr Peter Affolter het das heerlige 20 Jahr Junteressli-Bild kreierte, in 200 Exemplar lo drugge, signiert, nummeriert, in e Passepartout gsteggt und tiptop verpaggt, so dass dä Bhaltis wirgglig e wunderscheen Aadängge ans Geburtsdaagsfescht worden isch. Wär jetz aber nit derby gsi isch oder sone Helge noochestelle mecht, kaa - so langs het - fir 30.-- Frangge no aine haa. Derzue het dr Peter no zäh Exemplar äxtra koloriert; die sin sogar scho im ene Rahme! Die glaini, exklusivi Ufflaag



kaa me fir 300.-- Frangge pro Bild kaufe. Me het dermit e koschber und aimoolig Junteressli-Bild und understützt glychzytig d Cliquekasse! E baar vo däne Helge sin scho ewägg, wär intressiert isch, muess sich meeglisch bald mälde!

Dr glatt Obe vom 25. Novämber het im Volggshuuskäller mit eme Apéro aagfange, won ys die Junge Junteressli mit eme Super-Pfyffersolo, em "Arabi 20", und mit em "Ueli" vo zwai härzige Dambüürli iberrascht hänn. Im ene Zigli dur s Schoofgässli - voruus die Junge mit Drummle und Pfyffe - simmer haiter, hungrig und gwundrig ins Café Spitz marschiert und im Merian-Saal an die wunderscheen deggte und vom Rita prachtvoll goldig dekorierte Disch gsässe. Es isch e vergniegte und beschwingten Obe worde!

Uff de näggschte Syte vo däm "Junteross" kaa me noonemool e Bligg zrugge wärfe uff das Geburtsdaagsfescht. D Foti, d Lithos und s Layout hänn s Fränzi Bär und dr Andy Soldan gmacht.



Wenn s Dänni lächlet und s Caroline ins  
Kerzeliicht blinzlet, gits sicher ebbis Guets  
zum Aesse und Sirpfle!



Sy grinse und schnäädere ...



... dischpediere und ziggle ...


20 JOHR JUNTERESSLI



... warte uff s Aesse ...




... oder flirte ...




... und bim 50er-Clübli gits erscht rächt vyl zum  
Verzelle!


## 20 JOHR JUNTERESSLI



Alli Dambuure mache zämme s "Quartett": E zimftige, rassige und fulminante Programm-Ufftakt!



20 JOHR JUNTERESSLI



Dr Bössli mit synere sensationelle  
Aigekonstruktion vom ene  
zwäggmässige Noteständer!

## 20 JOHR JUNTERESSLI



Em Thierry syni Pfyffer-Brandywine-änd-Musical-Girls ...  
... biete nadyrlig au e Super-Ysatz!





# 20 JOHR JUNTERESSLI



Dr Santiglaus liist zerscht emool em ganze Vorstand  
d Levite und bringt em dr Clique-Gaischt im ene  
Riiseglas mit!

20 JOHR JUNTERESSLI



S Caroline wird als Drummelchefene uffgmunteret!



S Martina bikunnt Rootschleeg als Instruggtere  
vo de Junge!

## 20 JOHR JUNTERESSLI



Au s Ingrid muess em Santiglaus Reed und Antwort stoh!



S Hummi bikunnt e Regiekappe fir dr Obe und e Zellrahme fir s 50er-Clübli, zem Noochzelle, wiewyl Fuffzgerli ass es git!

# 20 JOHR JUNTERESSLI




Fir dr Peter Affolter zieht dr Santiglaus  
en Iberglaid zem Ladärnemoole uus em Sagg!



Und fir dr Victor het er die ganz grooss  
Iberraschig barat:

20 JOHR JUNTERESSLI




Nämlig e Super-Morgestraich-Goschdym  
in Form vom ene tolle "amerikanische Drummelhund-Keenig"!

# 20 JOHR JUNTERESSLI



Und scho sin drei Drummelhünd, dasmool aber Basler,  
uff dr Pischte und ruesse s Ysebähkli.



E ganz bsunders und rasants "Duell"  
hänn die baide Andy botte.

## 20 JOHR JUNTERESSLI



Plätsch! Schärbe am Bode und e lute Gyx vo dr "Servierdochter" Sylvie Wessang!



Druff abe dr "Källner" André Jaeggy und scho isch e glatte Sketch (ganz à la Charivari) im Gang!



S Sylvie Wessang und dr André Jaeggy bringe d Junteressli in Ekstase mit em Lied "Isch das denn nit e richtig Wunder ..."

# 20 JOHR JUNTERESSLI



Dr Rolf Wagner am Klavier sorgt wie allewyl fir die heerligi, musikalischi Unterhaltig ...



... und dr Thierry fäggt zämme mit em Trio Wagner "Big-Bänd- Muusig" ane ...





... dass d Junteressli bim Schwoofe  
bald ins Schwitze kerme!



Nach getaner Arbeit: Dr Santiglaus Andy Fischer,  
dr Peter Affolter, dr Thierry, s Sylvie Wessang und dr  
André Jaeggy gniesse ihri erfolgryche Ufftritt und dr  
glatt und haimelig Junteressli-Geburtsdaag!

## 20 JOHR JUNTERESSLI

In synere glänzende Reed het dr Victor vor allem Wärt gleggt uff s Zämmehalte, Zämmeblybe und d Frindschaft pflääge: "Es wär guet, wenn me vermehrt luegt, dass es jedem wohl isch in dr Clique!" Näbem guete Drummle und Pfyffe sälbverständlich!

Au vo dr jetz zwanzigjährige und dorum erwaggsene, mündige Clique het är gredet. Und au vo däne Junteressli, wo im Lauf vo de Johr uusdrätte und nimme bin ys sin. Ainzeln sin das zwor numme gsi und d Clique het s Gligg ghaa, dass si in däne erschte zwanzig Johr kaini Gräch oder gar Spaltige erläbt het! Das soll in Zuekunft au esoo blybe!

Wenn e Clique elter wird, wärdes nadyrlig au d Mitglieder und denn gits "Groosmieterere und Groosvätterere und dorum soll d Clique blybe wie si jetz isch, nämlich ai Clique, wo die jingschte mit den eltere Mitglieder wänn zämmesy; dass me sich maag, dass me mitenand kaa Freud haa, gmainsam kaa ebbis unternäh und mitenand Fasnacht mache!"

E hätzlig Danggscheen het dr Victor derno ans Rita Bonnet fir die prächtigi, goldigi Dischdekoration grichtet und an Peter Affolter fir dr Helge, won är als Bhaltis fir alli entworfe und gstiftet het. Esoone Helge, e handkolorierte, het au s Hummi derfe in Empfang näh fir d Organisation vom Obe.

Dass es nit ganz sälbverständlich isch, wenn e Clique zämmehebt, jo, dass es fascht an e Wunder gränzt, wenn me esoo vyl Kepf und Mainige iberhaupt under ai Huet bringe kaa - zue däm Schluss sin au s Martina und s Hummi koo und hänn das im ene Värs expliziert. Under anderem esoo:

Und will jo Draim schynts wärde woher,  
- au dä vo unsre zwanzig Johr! -  
so dängget draa - das isch kai Gääg -  
s isch Fasnacht in gnau hundert Dääg!

Und stellsch Dr vor, was denn bassiert,  
wenn s Fasnachtsfieber doo grassiert,  
und was, wie uus em Untergrund,  
uff ai Dätsch alles firekunnt,  
denn frogsch Di, kaa das wirgglig sy,  
isch das die glychi Stadt am Rhy,  
wo sunscht s Johr dure ehnder stinggt

## 20 JOHR JUNTERESSLI

und kaini Maischterwärgg vollbringt?  
Me froggt au, sins die glyche Lyt,  
wo in dr Stadt zue jeder Zyt  
sunscht nydig ummenanderschwire  
mit hässiger und mieder Bire?

He jo, muesch sage, grad erscht rächt!  
Und d Fasnacht mischlet gar nit schlächt  
die Menschegnungele durenand,  
wo pfyfft und drummlet mitenand:  
S git Dyssi und s git Zwätschgekepf,  
s git alti Schachtle, jungi Gnepf,  
s git Rätzebälle und s git Bääse,  
s git Sydehäsli und s git Schääse,  
s git Sibesieche, tolli Fääger,  
s git Fätze als Ladärneträäger,  
s git Rychi, Armi, Stilli, Luti,  
s git Sydiaane und s git Duti!  
Und alles das macht frehlig mit  
und lauft drei Daag im glyche Schritt!  
Das gränzt, bi some Driber-Drunder  
nadyrlig fascht scho an e Wunder!

Derno hänn si vom Fasnachtswunder verzellt und wie sich d Stadt  
drei Daag lang numme no fir ganz spezielli Schlagzyle intressiert:

Wo losst ächt d Märtplatz d Goschdym naie?  
Wo gits die beschti Zibelewaie?  
Hets uff de Wäge glatti Sieche?  
Wenn goht no s letschte Tram nach Rieche?  
Dr Pfluddebegg macht wider mit!  
Verbasset d Luggebiesser nit!  
D Rätz het im Vortrab Hundeli!  
Wär drummlet bi dr Gundeli?  
Het d Spale wirgglig neyschtens Wybli?  
Blybt ächt dr Räber Basler Dybli?  
Wär moolt d Ladärne vo dr Lälli?  
D Olymper sin schynts alles Gschwälli!

## 20 JOHR JUNTERESSLI

Und d Stainlemer sin Chauvinische!  
Wär Drummle filzt, bikunnt jetz Kische!  
Wo koschtet d Stange Bier zwai Stutz?  
Gits Lääberli im Bruune Mutz?  
Sin d Kuttlebutzer lycht pervärs?  
S haig d Striggedde e wieschte Värs!  
Syt zwanzig Johr im Fasnachts-Plunder  
gesehsch d Junteressli! - Dasch e Wunder!

Und zletscht hänn s Sylvie Wessang und dr André Jaeggy das Wunder  
au no im ene glatte Lied besunge:

(Melodie: "Get me in church on time" aus My fair Lady)

Isch das denn nit e richtig Wunder,  
dass es die Fasnacht däwäg git?  
Trotz lutem Schreie  
in alle Parteie  
laufsch z Basel doch im glyche Schritt!

S goht alles driber und goht drunder,  
das isch jo wurscht, so gits e Kitt!  
Im Drägg verdringge  
und d Luft duet stingge:  
Fir drei Dääg zellt das alles nit!

Bachab goht s maischte - d Regierig het e Buff,  
d Stadt isch voll Rueche - alles macht aim muff:

Drum isch es doch e richtig Wunder,  
dass es die Fasnacht däwäg git!  
Trotz allem Kääre,  
und Gschyys und Affäre  
laufsch mitenand im Schritt, mitenand im Schritt,  
laufsch mitenand im glyche Schritt und Tritt!

Isch das denn nit e richtig Wunder,  
dass es die Junteressli git?

## 20 JOHR JUNTERESSLI

Jedes e Mainig,  
sälte ganz ainig,  
doch laufe sy im glyche Schritt!

S goht mänggmool driber und goht drunder,  
das isch jo wurscht, so gspyrch dr Kitt!  
Dien d Pfyffer strigge,  
hänn d Drummler Zigge,  
sy laufe doch im glyche Schritt!

Bachab goht s maischte - und das syt zwanzig Johr,  
dr Vorstand pfüüserlet - drum singe mir im Chor:

Isch das denn nit e richtig Wunder,  
dass es die Junteressli git?  
Trotz allem Bapple  
und Ummezapple  
laufsch mitenand im Schritt, mitenand im Schritt,  
laufsch mitenand im glyche Schritt und Tritt!



André Steiner, Trommelbau  
Oetlingerstrasse 39, 4057 Basel  
Tel. 061/692 46 20

Up to date und guet frisiert  
wirsch bi dr F r ä n z i garantiert!

Fränzi Rupp

bim Eric Schmid Coiffure  
Freii Strooss 47, Basel, Tel. 25 15 10

## CLIQUE - KALÄNDER

28. Januar	Intärns vo de Junge Junteressli
6. Februar	Marschiebig Niederholz
10. Februar	Final Brysdrumme und -pfyffe
12. Februar	Charivari Marschiebig Hard
19. Februar	Drummeli
20. Februar	Marschiebig Niederholz
24. Februar	Larve-Usgob im Käller
25. Februar	Marschiebig bim Joggeli
4. März	Ladärne-Apéro
5. März	Fasnacht
18. März	Bummel Jungi Junteressli
25. März	Bummel Stamm

Clique-Käller Tel.Nr.: 691 92 01

Me kauft - s sott sälbverständlich sy -  
bi unsre Inseränte y !

Junteross-Redaktion:

Hummi, Fränzi Bär, Peter Bütler

